

(25.) 6687  
PRIMITIÆ,  
SIVE  
ORATIO  
HABITA OXONIAE  
IN SCHOLA THEOLOGICA  
NONO NOVEMBRIS.

ET  
CONCIO LATINA AD  
BACCALAVREOS DIE  
CINERVM.

Per SAMUELEM FELL Præbendarium Ecclesiæ  
Christi, & Publicum Professore in Theo-  
logiâ, pro Dominâ MARGARETA  
Comitißâ Richmondia.



OXONIÆ,  
Excudebant IOHANNES LICHFIELD, &  
GVILIELMVS TVRNER, 1627.







## PRIMITIÆ.



Lorentissimi Academici, Viri fratres in Christo mihi intimè dilecti. Prodeoque jam tandem non tam merito aut arbitrio meo, quam beneficio & favore vestro, in hanc lucem Academicam; ad cuius aspectum animus fugit, oculi planè cæcutiunt. Non enim me latet, quantum onus expectationem vestram non dicam explere, sed ferre, quantum opus in hoc nobilissimo studiorum gymnasio, celeberrimo Europæi orbis emporio, merces, præsertim sacras, non terrâ marive advectas, sed coelitus dilapsas propalare. Professoris enim vestri nomen grande aliquid pollicetur, non tantum apud vos dicere, quod quivis ex Rhetorculorum familia facile potest, sed dictare, quod istius loci & instituti proprium est, nodos solvere, gryphos & strophas diluere, scrupulos eximere, *Antichristo* regnanti, *Iesaiæ* grassanti, *Pelagiano* insidianti, omnibus simul conjuratis Ecclesiæ hostibus bellum indicere. Quod si periculum non esset, eminentia certè istius dignitatis me planè exanimaret, neq; tam ornare, quam onerare videretur, cum veneranda antiquitas Doctoris cathedram

cum tribunali Iudicum, aut principum folio compararit.

Illud etiam accedit infortunij, quod sæpiùs antehac summâ cum lætitiâ recolere solebam, præclara antecessoris merita; quæ tanta sunt, vt non acuant studium, sed planè obruant; qui per quatuordecim annos in hoc curriculo magnâ cum laude suâ, & fructu vestro desudauit. Flos Doctorum, & purpuratorum gemmula, *ὁ δὲ δόξιας* genius, & veritatis sacræ mystes integerrimus, vir natus ad reformandos Academicorum mores, effigie quadam vitæ, cui vis plastica & formatrix inerat, ita factus ad informandos hominum animos, vt splendidâ doctrinæ face toti Christiano orbi præluceret. Sed reprimo me ab istâ laudandi intemperie, vbi libenter luxuriari oratio velit. Etsi enim ita in confinio mortis nuper fuit, vt nihil restare videretur, præter extremum beati spiritus halitum, quem Deo multis testibus commendatissimum esse voluit; nondum tamen ad plures abiit, (in quorum laudibus liberè expatiari licet) aut si mortuus, certè resurrexit, sepultus fateor, sed in Bibliotheca, nondum vermium esca, sed ipse literatus quidam vermiculus, librorum tinea, novo appetitu volumina dum condit, rodit, vbj exemplo suo, & scriptis quæ meditatur magis conspicuus, quàm aut hominum sensibus, aut populari plausu, aut elumbi oratione mea, quæ nihil addit, aut confert laudando, sed à laudati meritis lucem, & vires mutuatur. Macte esto Venerandè senex, si non scholæ, cui nunciū remisisti, saltè Ecclesiæ diutissimè superstes; mihi successoribusq; nostris conqueri licet, de non ferendâ injuriâ quâ nos omnes onerasti, exemplo scilicet tanto, tamq; eminenti, cui ne somniando quidem, similes vnquam futuri simus.

Paren-



Parentavi paucis (benevoli Auditores) antesignano, & patri meo clarissimo *Benfeildio*. Iusta illi solvere nec unquam possum, neq; adhuc debeo. Date veniam, ut eodem pietatis affectu, verbo litare possim lectissimæ Heroinæ, *MARGARETÆ Comitissæ Richmundiæ*, Lecturæ istius Fundatrici; ex cuius utero prodijt *HENRICVS* septimus Regum *Πολυτιμώτατος*, intestini illius & fatalis belli mora ac periodus; cuius adhuc manu aluntur homines dirimendis litibus, & pugnis scholasticis idonei; quæq; ut regias utrinq; familias sanguine conjunxit, ita utramq; regni *Academiam*, aureo quodam munificentia vinculo sociavit.

Bis etiam hoc in loco memorandus *Honoratissimus Dominus GVLIELMVS PAGETTUS Baro de Budesfert*, si à pensione grates mihi pensandæ essent; qui è nobis olim exijt eruditus, redijt ad nos iterum verè aureus; neq; sibi in literis profecisse videbatur, nisi literatis aliquando prodesse possit. Nobilium (ut perhibetur) ubicunq; demum sint, longè Doctissimus, cuius familia est quasi nova Academia, cum vitam ipse agat togatam, etiam sub paludamento.

**H**Is prælibatis pro more istius loci & officij mei, restat ut de scholarum usu, de publicâ Theologiæ professione, de scholasticis controversijs in negotio religionis, de politicis quibusdam moderatoribus, verba apud vos faciam.

Cum à belluino vitæ instituto, ab esu glandium, ab agris & devijs, quibus palabundi errabant homines intra vrbes & mœnia cogerentur, neq; adhuc bestiam, quâ plus æquo versati essent, exuerent, aut hominem, quem

facie tantum referebant, induisse viderentur, nisi scholas instituerent, ubi ferulae umbram magis cicurantur ferocientes animi, quam aut ergastulorum strepitu, aut carnificinae laniena. Hinc codices, miri hominum transmutandorum artifices, & toga, cui non tantum arma, sed imperia cessere, & Philosophus, animal natum ad sublimandam speciem suam, ex cuius *sive stoâ, sive Lyceo*, quasi saxei ex *Pirra* manu, aut *Medeæ* aheno filicernia, in maturos vegetosque transmutantur. Dies me deficeret, si pulsarem tantum fores philosophorum, si ipsorum genealogias, contexerem, vereor (ut cum Apostolo loquar) ne genealogiae ἀνέγερτοι, infinitae & interminabiles videantur, 1. *Tim.* 1. 4. Valete igitur barbæ & togæ, cum jam sublimiores animæ me non tantum vocant, sed in sacratiora ipsorum adyta sequacem rapiunt. Siue illæ prophetarum scholæ, 2. *Reg.* 2. 6. siue Apostolicæ, *Antiochena* scilicet, & *Alexandrina*, quarum vestigia extiterunt tempore *Constantini*. Erant enim ut Ecclesiæ, ita & scholæ quædam Apostolicæ, primævæ fidei seminaria, & coloniae pietatis. *Eusebius* ex *Philone*, & *Hieronymus* referunt, *Marcum Evangelistam* agmina Philosophantium, qui lectionibus, disquisitionibus, disputationibus, & sacrae paginae invigilabant in celeberrimâ *Ægypti urbe Alexandria* coegisse. Bonis avibus, & felicissimo conatu, ut à filio *Petri*, 1. *Pet.* 5. gymnasium hoc institueretur, ex quo, tanquam ex *Equo Troiano*, lectissimi Theologi prodierunt. Quibus ego te præconijs memorem ô *Paptene*, lapis istius scholæ angularis, qui usus es ijs magistris, qui in carne Apostolos vidissent. cui succenturiatur *Clemens Siromateus*, eo nomine à singulari opere insignitus, cuius discipulus erat, teste *Photio*



*Photio, Origines Adamantius*, quid loquar de *Tryphone?*  
*Heracle, Dionysio, Anatolio, Pierio, Theone, Didymo,*  
*Maximo philosopho & Episcopo Constantinopolitano?*  
 & si *Niceta* credere velimus, infelix illud portentum  
*Arrius*, quasi alter *Iudas* inter Apostolos, præfecti Ca-  
 thedram in hac scholâ invadebat. Prætereo *Nisibenam*  
*Syrorum Christianorum; Antiochenam* sine sacrilegio  
 silere non possum, propter baptismum, & incunabula  
 Christianismi, *Act. 11.2.* in qua *Lucianus* presbyter do-  
 ctissimus (teste *Hieronymo* in Catalogo) sacram Scrip-  
 turam interpretatus est.

Sed ut in statu politico familiæ in vicos, & viculi in  
 urbem; ita in republicâ literariâ scholæ in collegia, &  
 hæc in *Academiam* transmigrarunt. In qua, si vspiam  
 terrarum est paradisus visibilis, amoenitatum hortuli,  
 aromatum suaveolentes arcolæ, antiquo & genuino no-  
 mine *Vniversitas* nominata, quasi vniversalis Mappa &  
 Chartula deliciarum, & suavitatis vniversæ myrotheci-  
 um. Hæc sunt *Academie* spatia de quibus somniarunt  
 Philosophi. Umbratilia fateor, sed alis & misericordiâ  
 Dei adumbrata. Vbi tria tabernacula, Primum *Christo*,  
 alterum *Elia*, tertium *Mosi*. Tempia & oratoria nostra  
 sunt *Christo* destinata, sanctuarij Domino & nostro.  
 Scholæ *Elia* fervido & igneo contemplationis curru in  
 coelum abrepto. Bibliothecæ *Mosi* primo vtriusq; tabu-  
 læ custodi, & librorum scriptori. In isto quidem trivio,  
 quodlibet punctum coelo est concentricum, & ab hoc  
 triangulo, per viam innocentiae lacteam, ad æternum nec  
 mathematicum aut imaginarium coelorum circulum  
 transeamus. Complectar brevi. *Academie*, quæ com-  
 muni nomine studia vocantur generalia, sunt officinæ  
 animarum

animarum, hominum formandorum incudes, oracula totius orbis, veritatis & iudicii metropoles. Ita ut usurpare libeat illud prudentissimæ matronæ, 2. Sam. 20. Proverbium est, ut qui interrogat, interroget in *Abela*, qui interrogat, interroget *Oxoniam*; quæ jam olim fuit *Abela* nostri Israelis, aut *Cariatsephar*, hoc est, literarum & disciplinæ civitas, ubi difficiles quæstionum nodi, pro more solvebantur.

Vnde principes inter primas imperij curas habuerunt, ornare hæc Musarum alvearia. Ut *Episcopi Gallicani* in *Concilio Parisiensi* postulant à *Ludovico Pio* Imperatore, ut exemplo patris *CAROLI Magni*, in tribus congruentissimis imperij locis, publica Gymnasia constitueret. Ab hoc fonte regię & invidendæ collegiorum strues, Bibliothecarum preciosa & inæstimabilis supellex, professorum salaria, quæ ut meritorum dotes, ita studiorum anima, & vitalis spiritus. Etsi enim humaniores artes non sint meritorię, sed liberales; neq; ad æs exeant, aut *Minervæ* inhiant, sed disciplinę; nescio tamē, quomodo, sunt aurei quidā stimuli, qui viros etiam doctos incitant, acuuntq; , neq; *Pegaseium* expectetis melos, ubi splendor nummi, aut lucelli spes aliqua non affulserit. Non enim vescuntur viri *Mercuriales* aurā populari, neq; tenui hoc corpusculo ali potest ipsa subtilitas, cum populi plausus non magis nutriant, quàm odores, hi marium, illi tantum aurium lenocinia. Gratulor hac ex parte communi nostræ matri, artiumq; professoribus apud nos vniuersis. Cum non tantum nitescant scholarum parietes, sed ditescant locorum genij, neque famelici lectores aut sordide vivant, aut præ inediā jejunent. Repende o Domine *Macenatibus* nostris septu-

plura



plum in sinus eorum, & ut cumulaſti beneficia, ita incen-  
de ſtudia, intende merita. Vſurpaſſem illud *Psalmiſta*;  
non fecit ſimiliter vlli nationi; niſi antiquæ & huic noſtrę  
æmulæ *Lutetiæ*, jam numerarent ſex Profeſſores in ar-  
chitectonicâ, & ſupremâ omnium facultatum theolo-  
giâ, tres Regios, duos *Henrici* quarti verè Magni, terti-  
um *Ludovici* filij patrizantis, reliquos pedarios, *Sorbo-  
nicum* vnum, duos privatorum ſtipendijs militantes.  
Quidni igitur novo muniti viatico, & ſplendidiffimè  
ornati noſtram etiam ornemus ſpartam? neq; diutiùs  
cum *Martha* multis impliciti ſimus, ſed cum *Mariâ* par-  
tem meliorem, portionem noſtram vivam, æternam *Ie-  
ſum Chriſtum* deligamus? Quid nos magnorum limen,  
ut humili ita & labili terimus pede? & *Ariſtippi* quidam  
(proh pudor!) Chriſtiani, ſalivam eorum lambimus?

*laudare parati*

*Si bene ruſtarent.* Quid agunt in ſæculo ſacri religio-  
nis myſtæ? vbi nihil eorum intereſt, niſi ut quam celer-  
rimè exire poſſint. Quid pereunt cum perdito, quorum  
theſauri in Domino abſcondi debent? Erumpet vera  
vox, neq; me poſſum reprimere diutiùs; Perdidisti vos  
(*Florentes Academici*) cum in ſæculum plus æquo, &  
vias gentium Larvatas, paraſiticas, ſimulatorias exiſtis.

Ambitus veſter vnicus & ſingularis eſto nihil ambi-  
re. Si qui procereſ ſunt, quibus vos mancipetis, inquire-  
te in primæva hiſtoria pugiles illos, qui pro *Chriſto* cum  
beſtijs luſtati ſunt. Si in Epiſcoporum clientelam vos  
tradere velitis, præſules illos conſulite, qui in *Concilijs*  
adhuc ſpirant, & loquuntur meliùs, quàm aut *Iuppiter*  
ille *Hammon Romanus*, aut conclaviculari *Cardinales*.  
Suſpicite antiquos patres venerandę canitiei, magiſtros

ad pietatem, consiliarios, testes, iudices, quorum fidei omnes Catholici agglutinantur, ut scitè *Lirinensis*. Placet mihi siue apologus, siue pictura, quæ oculatissimos ætatis nostræ theologos, nani imagine gigantum humeris super impositi repræsentat, videt quidem oculis suis, licet longè & eminenter prospiciat pedibus levatus alienis. Horresco planè atq; detestor *Stapletoni* *vesaniam* *Tom. 2. pag. 474.* qui (vna excepta antiquitatis gravitate,) scopticè satis & magistraliter Ecclesiam & theologos posteriorum temporum, eos scilicet, qui non-gentis & amplius annis floruerunt, cum primâ illâ (primitivâ, ni fallor Ecclesiâ) satis laudabiliter, sine invidiâ posse comparari. Neque ferre possum *Bellarmini* typhum, qui integras Patrum decadas, ubi ad palatum non sapiunt, unicâ tantum spongiâ expungit atq; obliterat, cum sanis auribus consensus veterum sit suavissimis concentus, & coelestis quædam harmonia. His ego nominibus solis assurgo, veneror ut patres, eoque magis quasi matris Ecclesiæ paranymp hos. Immoror nonnunquam recentibus, antiquis immorior. Vtiles esse fateor, neotericos, ut præparent Theologum, non detineant. Dolendum enim est, senescere studiosos terendis progymnasmatibus, manualibus, systematis, thesibus, methodis, opusculis, synopticis Doctorculis. His ego elementarijs lac & virgam commendari cupio, & stigma frontibus inuri: Ego sum *Calvini*, ego *Arminij*. Non libenter audio, aut ex vultu parte insipidos Encomiastas, *Lutherum* esse supremum Ecclesiæ patrem, cuius non puderet *Augustinum* esse discipulum. *Philippum* esse *Paulo* proximum. Nec dissimile *Calvini* institutionum elogium: *Præter Apostolicas post Christi tempora chartas*



*chartas, Huic peperere libro sacula nulla parem.*

Multo minùs putida illa & dentata dicteria; Ego iudico vnum *Petrum Lombardum* pluris esse, quam centum *Lutheros*, ducentos *Melanchthones*, trecentos *Bullingeros*, quadringentos *Petros Martyres*, & quingentos *Calvinos*; qui omnes si in mortario contunderentur, non exprimeretur vna vncia sanæ theologiæ. Hæc fortasse *Stancarum* hominem vesanum, & hæreticum decere possint. Sed non libenter audio *Bolssecas* quosdam reformatos, *Fevardentios Anglicanos*, spiritu *Ignatiano* debacchantes in sacros *Calvini* manes, qui in hoc vnico argumento facundi, neq; concionari, nec dictare, nec scribere, nec joculari (joculariter plerumq; hæc præstant omnia) aut quicquam possunt, nisi *Calvinum* lancinent, aut effingant sibi puritanum. Obsoletæ jam pridem sunt istæ *Iesuitarum* næniæ, & mimi apud eos exauçtorati, vos autem locustarum hoc virus lingere, & in Ecclesiam Dei evomere, prodire in templum, domum Dei vivi, tanquam in scenam, & histrionum more scurram agere *Iesuitam*, sub personâ ministri Evangelici. O dementiam! ô piaculum! Nemo sit apud nos, aut tam ineptus, vt in omnia *Calvini* verba jurare velit; neq; tam ingratus, vt dicere pudeat, quibus magistris in *Christo* profecerit.

Inter veteres istos Patres, duces in viâ, & modernos scriptores comites nostros ac familiares, sunt mediij quidam non contemnendæ authoritatis, qui à scholâ *Scholastici* appellantur. Nomen antiquum fateor, primum à foro, deinde in Ecclesiam à Rhetorum officinis tralatum, vnde in concilijs defensores *Scholastici* occurrunt. Vfus tamen obtinuit, vt is solus hoc titulo honestetur,

qui in pulvere desudat Academico, & athletico quodam robore, syllogismis certat, & contortis enthemematis, & bicorni argumento, tanquam ariete, prosternit adversarium. Hæc est polemica & virilis *Theologia*, quæ armata profiluit non ex *Iovis*, sed *Lombardi* cerebro, novâ tamen indies instructa panopliâ, sive à *Doctore invincibili*, sive *irrefragabili*, sive à *Seraphico*, sive *Cherubico* per quinque jam tandem annorum 'læcula in scholis dominatur. Pulverulenta igitur est hæc facultas, & perusta folibus, ut bellatricem decet, neque mirum, si calamistratis quibusdam Rhetoricantibus, qui voculas, ut muscas captare solent, non arrideat, utpote hiulca, & salebrosa, nec compta satis. Sed transeo istos cum suis thesauris, sive *Stephani*, sive *Nizolij*, & *Varronem* ijs omnibus oppono; Avi & atavi nostri cum allium & cæpe eorum verba olerent, tamen optimè animati, & cordatissimi erant. Philologos ad vnum omnes prudens moneo, ut hereant in verborum cortice, & cum cane vitrum lambant exterius, nec pulvem attingant, & ut abstinere velint ab hac arenâ scholasticarum contentionum, ubi quasi lacertis res peragenda erunt, non tantum linguis, *pede pes demsusq; viro vir*. Neque causentur scholasticos aliquando obscuros, aut subtiles nimis, quidni tenebricosi sint blæsis aut lusciosis, qui *μυωπεζοι* vel luce meridianâ caligare solent. Neque displicere cuiquam debet subtilitas si aliquid est præter subtilitatem, non magis quam aristarum acumen, ubi cum spicâ, fructus vberissimi percipiuntur. *Seneca* illud, non est sententia, sed oraculum: summâ subtilitate nihil agi; & salvâ scholasticorum pace cum *Henrico Gandavensi* dici potest; dum subtilitatem sæcularis philosophiæ nimis sequuntur, splendorem aliquantulum



quantulum theologicæ puritatis obnubilant. Miserrima est illius scholæ conditio, quæ titulis magisterij se tantum tueri potest, vbi Sophistæ regnant, & Antichristus moderatur. Et si vspiciam *Lutherus* duriusculè de Academijs, aut scholasticis locutus fuit; vt eas esse Antichristi lupanaria, illam vero ignorantiam veritatis, & fallaciam inanem; siq; *Melanchthon* prophanam eam vocet, *Lutetie* natam, quâ admissâ Evangelium est obscuratum, ac fides extincta, intelligi volunt de Academijs & Doctoribus illis; de quibus *Psalmista*, *Psal.* 32. 9. Ne sitis tanquam equus & mulus, in quibus non est intellectus, quorum maxillæ lupato & fræno Pontificio ita constringuntur, vt nec dicere, nec scribere, nec vivere vnquam possint, nisi spiritus sanctus *Româ* afflauerit. Vna hæc euria omnes corrumpit scholas, & imaginaria *Petri* Cathedra omnium Doctorum Cathedras vno ictu infallibilis iudicij pessundedit. Palpones enim isti theologi pessimè semper de Ecclesia meriti sunt. Vbi autem scholastici suo decurrunt alveo, & fundantur tantum principijs revelatis, (sic enim sani loquuntur) eorum doctrinam radium esse confiteor illius lucis theologicæ, quæ jam pridem coeliûs delapsa est. Quod autem *Camus* omnes simul scholasticos in fide errare non posse asserit, temerarium plane est, affine damnatissime, & insulsæ illi, hæresi, *Romani* tripodis genium falli non posse. Concludunt verè, si vera præmittant, fabri conclusionum, non principiorum artifices; & scholasticorum illationes ex se, & vi suâ, opinionem tantum generant, non fidem. Hi sunt limites nostræ scholæ, & cancelli, quæ si litigiosa nonnunquam sit, non minùs ferenda, quàm vxor querula, fatali quodam necessitatis viâculo conjuncta & as-

fociata. Pugnae enim & lites utrobique sunt necessariae, quia haereses non tantum expedit esse, sed oportet *I. Cor. II. 19.* Bella in corpore politico, controversiae in Ecclesiastico, medicamenta in naturali, molesta & gravia esse solent, propter effectum tamen salutarem sunt necessaria. Trituratur enim granum, ut reponatur in horreum, lapis quadratur, ut sine mallei sonitu in templi edificio collocetur; movetur turbo, ut *Elias* in coelum rapiatur; ventilatur quaestio, ut abditi veritatis sensus eliciantur. In hac enim sylva haeresis, & segete errorum, in procinctu nos omnes stare necessum est, neque hac tempestate fas est, sedere diutius ad aquas *Siloes* placidas atque tranquillas, sed ad obstreperos illos & turbidos *Iurgij* torrentes.

Armata vos tandem (Academici) neque ad velitationes ego ludicras & pueriles, sed ad statarias & masculas verborum pugnas, vos invito. *Hannibal* enim ad portas jam pridem dici potuit; quassantur moenia non tam ariete & tormentis, quam vinea & cuniculis, imo intra muros sunt infensissimi hostes, *Iesuita* truculentus, *sacrificulus* subdolus, *Pelagianus Romanizans*, minister amphibius, & ex adversa parte, eodem tamen periculo, quasi per pseudothyram subrepens puritanus. Si unquam, uspiam Ecclesiae navicula decumanis fluctibus iactata fuit, haec certe est horrida tempestas, pravia illius igneae; gemunt rudentes, tremunt nautae, stridunt mali, & tu cum *Jonah* quasi crapulam exhalares, ita & periculum edormies? Audistis classicum belli sacri imo execrandi, scripsit impurissimus *Scioppius*, gessit saevissimus omnium *Hispanus*, qui novum exhauriet orbem, ut occidentale (occiduum potius) imperium de novo erigat,



gat, & vos *ῥιζὸς τοῦ* receptui canetis?

Non miretur quispiam castrensem hanc, & bellicam dicendi formulam, videor hodierno die in *Arcopago* constitutus, cum ab hac militiâ umbratili atq; togatâ excitantur studia, accenduntur animi,

*veræq; parantur arene.*

Fuit aliquando ætas, cum mentis æstus, & contentio honori fuit professoribus vestris; & tubam inflare Academicam non fraudi aut ignominia cuiquam erat, cujus spiritu lutei *Babylonis*, ut *Iericuntis* muri, disijciantur. Sed alia nunc, & nova rerum facies. Sinite adversarium triumphare ulterius, serveat ab incude *Duacena* juvenus *Anglicana*, limâ formetur *Iesuiticâ*, virus exugat & concoquat *Hispanicum*; ubiq; terrarum splendeant *Ignatianorum* collegia, & nova indies erigantur; & nuperimo instituto, in *Academia Parisiensi Reginae* Matris impulsu atq; hortatu novus creetur professor in Theologia, qui ex mente principis dogmata fidei, ab hæreticis in controversiam adducta explanare debet; vos interim sedete, tacete, & non manus tantum, ut magistrorum ferulæ, sed jugulos etiam, ut inimicorum gladio præbete.

Languorem enim fidei, & faculentam requiem, plusquam *Moabiticam*, nonnulli non exercent modò, sed dogmatizant; quorum sensu, zelus heroica illa virtus, factio estimanda erit, odium *papatus*, est studium partium, cura animarum est *Calvinistica* quædam & pragmatica curiositas, sobrietas, modestia, sedulitas, omnia, (ô lepidissimum commentum) est purus putus puritanismus. Habeo & mihi & vobis mirificè commendatum virtutum omnium salem, & sedatæ mentis tesseram, moderationem.

rationem. Bonum nomen, si infandum non palliaret scelus, videant, ne, in fidei negotio, (de quo tantum loquor) dum fervorem extinguunt, teporem inducant; & quos tepidos volunt, stupidos tandem efficiant; & dum novi veteratores modestiæ famam affectare cupiunt, perfidiæ notam stigmatici sibi ipsis inurant. *Ænigma* plane est, nuperum hoc, & peregrinum animal, *homo moderatus*. Bonè *Oedipe*, enuclea, aut *Sphinx* est tuus, aut *Vertumnus* poeticus. Si ego in scenam hanc, monstrum quoddam producerem puellari facie blandâ atq; modestâ, corpore canino & rabido, alis vestito, utpote volatili, Leoninis vnguibus, vipereâ draconum caudâ, voce tantum humanâ, non dicam risum, sed fletum & planctum teneatis? Nascuntur *Sphinges* apud *Troglodytas* & *Æthiopes*, autor est *Diodorus Siculus*, l. 4. noster iste, quis, aut vnde sit, divinare non possum. *Anglo-Hispano-Romano Catholicus* procul dubio, homo ut horarum, ita & locorum omnium, & si opus fuerit, religionum. Oneravit eum laudibus, quibus potuit maximis, *Aglaüs* ille *Carrierius*, sui, ni fallor, effigiem delineans, larvatus minister, exuviæ *Protestantis*, & persona tantum *Evangelici*. Aut is est; aut ventricosus ille perfuga, bis terue apostata, massa adipis & fraudum *Spalatensis*, quo vno, cæterisq; omnibus ejusdem farinæ *Pseudolis* carere potest *Ecclesia Anglicana*. Patent fores, proficiscantur; taceant modò, nec horrenda spargant *Zizania*; nullam esse iustam schismatis causam inter *Ecclesias*, iunguntur iam gryphes equis; vna & eadem *Catholica* societas v bicunq; terrarum militat, sive sit *Antichristiana*, quæ est *Roma*, sive *Antitrinitaria*, quæ est *Cracovia*, vnde corollarium; in quâcunq; religione hominem servari posse.

Com.



Compendiaria hæc certè via est difflandi omnes simul controversias, trunci stipites, fungi scriptores nostri polemici, *Iuellus*, *Reinoldus*, *Whitakerus*, *Feildus*, *Abbotius*, qui vigilijs studijsq; contabuerunt; vt Schiomachiam exercerent meram. Gloriosi nostri Martyres gratis preciosum fuderunt sanguinem, tanquam aquam, in causâ triobolari & nihili. Mortuus est *Reverendissimus Cranmerus* tanquam canis, vt *Donatista* furibundus, aut *Circumcellio* fanaticus, aut *Iesuita* sicarius. Non gliscebant temporibus *Marianis* sanguinea (vt videtur) & cruda persecutio, sed iusta quædam, & necessaria legum executio. Exitus noster è *Babylone* non erit secessus, sed schisma, & religio, quam profiteamur, non est Ecclesiæ reformatio, sed politica quædam conspiratio.

Audiant *Neutralista* odiosum semper hominum genus, brevissimè dicam, aut *Papista* hæretici, aut nos non sumus Orthodoxi. Lis nostra non est de caprinâ lana, aut de fundi terminis, non contentio de stillicidijs aut aquæductibus, sed de cultu idolololatræ, de *Antichristi* tyrannide, de circumforaneis quibusdam imposturis in templo Dei, de ijs rebus, (vt cum *Augustino* loquar) quibus miserè semper videtur, aut beatè. Vtinam in tractandis hodiernis controversijs non tantum præjudicia, sed affectus (si fieri possit) reponantur, coelestis quædam serenitas ista est, nec in viâ sperari potest. Sed pax pax, ubi non est pax, est vox *Iacobi* & manus *Esaui*, *Ioabi* osculum cum pugione. Media hæc via inter *Deum* & *Baal* perniciofa semper Ecclesiæ fuit. Mitto reliqua. *Anastasis* facinus, sicut & proximi ejus antecessoris *Zenonis* edictum *inotum*, seu pacificatorium, totum orientem perdidit, (teste *Evagrîo*) innumerisq; hæresibus imple-

vit. Error enim cui non resistitur, approbatur, & veritas, cum non defenditur, opprimitur, ut probè *Innocentius*. Aptissimum enim est ad tegendas fraudes velum taciturnitas, & insidiæ istæ, quæ latent, gravius nocent, quia occultè feriunt. Detrahenda erit aliquando hæc larva politica, (falsa enim non semper fallent) & *Metius Sufsetius* jam diu Medius inter exercitus, alteri se parti adjungat, & dolore animi *Ambrosianis* verbis confitebitur, præstantiorem esse fortitudinem paucorum, quam frigidam multorum remissionem.

Fortiores ergo nos faciat (*Academici*) non tantum causa, sed conscientia, & gratulari vobis usque & usque liceat, avitam fidem, puram atque intactam. Nemo inter vos è familia mollium istorum *Eutheranorum*, nemo *Proteus Theologus*, aut chameleon literatus. Non in bicipiti somniasse *Parnasso*, aut stetisse in bivio vos memini, aut matrem *Academiæ* monstroso atque heterogeneo partu, hybrida quempiam enixam fuisse? Quodque miraculi instar grata & læta posteritas recolere cupiet, nullus in tantâ hominum *Universitate*, aut susurro *puritanus*, qui disciplinam matris *Ecclesiæ* clanculum sugillet; aut nocturnus *Antichristi* discipulus, qui doctrinam vellat; nullus *purpureæ meretricis* occultus leno; aut Iesuiticus proxeneta; aut Pelagianismi interpolator; sed quos nutrit *Academia* eruditos, eos consecrat *Ecclesiæ* orthodoxos. Neque quenquam moveat, quod istis gradibus in *Honoris* templum non ascendatur. Moderati forasse dominantur in terrâ, sed scriptum est; vim patitur regnum coelorum, & illud rapiunt violenti, *Math. 11. 12*. In quâ ego sententiâ divinâ plane & aureâ libens acquiesco. Et si hodierno die stylum ego strinxi liberius, iustus



stus dolor, vt zelum, ita & vocem expressit; hoc morbi genus non fascijs aut emplastris, sed cauterijs & ferro sanari potest.

Non sum tam valenti stomacho, vt ad farratas *Ægypti* ollas reverti velim, neq; tam delicato, vt *Ecclesia* ceremonias concoquere non possim. *Ecclesie Anglicanæ reformatæ, catholicæ*, filius obsequentissimus, ita vt *Iesuitismum Papisticum & Puritanum* vtrinq; ad inferos amandari cupiam. Communis *patria* servus, *Academia* istius semper Orthodoxæ alumnus. Vester etiam sum, non tam suffragijs vestris, quam obsequio meo.

**FINIS.**





CONCIO  
LATINA HA-  
BITA AD BACCA-  
LAVREOS DIE  
CINERVVM.

---

Ad Colossenses 2°. Versu 8°.

*Videte nequis vos deprædetur per phi-  
losophiam.*

---





## PRIMITIÆ.



V o d felix faustumq; sit  
 (Florentes Academici) con-  
 venimus hodierno die deuo-  
 ti & humiles in atrijs Dei vi-  
 vi, vt studia hæc vestra solen-  
 nia à cultu numinis inaugu-  
 remus. Optimo certè & pi-  
 entissimo maiorum instituto  
 (quod vtinam tam fidelitèr  
 observatum, quam feliciter inuentum) vt religio manu-  
 duceret philosophiam, vt à templo ad scholas, à Theo-  
 logo ad Philosophos, à concione ad argumenta, à Chri-  
 sto ad *Aristotelem* contento studio & cursu proceda-  
 tis. Si enim *ἡ ἀρχὴ* illa, quæ ab authore Porphyriana  
 dicitur, à necessitatis lege exordium sibi sumit, vnde pri-  
 mum omnium quæsitum in ipso limine Dialecticæ, an  
 quinq; conducant ad quatuor? certè hoc procœmium pi-  
 etatis ad omnia vtile est, 1. *Tim.* 4. Neq; quisquam verè  
 doctus, nisi idem syncerè pius esse velit. Preces vestræ  
 præliminares sunt matutinæ victimæ, & clauēs non tan-  
 tum scientiæ, sed Paradisi, & dum cum *Mose* manus in  
 a coelum

coelum eriguntur, prophanus *Amaleck* præualere non potest. Ego breuiter præibo, & vestro nomine sempiternas coeli pulsabo fores, vos interim occinite.

Immitte quæsumus Pater luminum lumen illud tuum, vt in lumine tuo Te lumen videamus, non igne fatuo luminis naturalis in auia errorum seducamur, sed cynosuram sequamur certam, æternum Deitatis radium, *Iesum Christum*, sine quo ipsa scientia inepta & stulta estimanda erit, ejusq; professores, suo acumine tanquam mucrone proprio seipso jugulant, & miserrimè confodiunt.

Quæ causa erat Apostolo proponendi hæc verba, eadem & ratio mihi hæc ipsa apud vos exponendi; Fuit Athenis, ibiq; expertus linguatam civitatem, cumq; omnes facundiæ, sapientiæq; Magistros degustasset, præmonitorium hoc concepit edictum, inquit *Tertullianus*. Nos sumus in Academia, quæ ipsis Athenis non est minùs Attica, vbi etiam linguæ judicijs aliquando acutiores, & nonnulli plus ore, quam corde sapiunt, qui captiunculis magis student, quàm veritati, & se philosophos, Philologos potiùs, quam Philotheologos salutare cupiunt. His ego. Audite præmonitionem fidam; Ne quis vos deprædetur. Habete præmunitionem certam, laqueus in specie est Philosophia. Præmoniti, præmuniti ab aucupio verborum, & literarum tendiculis, à nasæ hac & pedicâ, quam etiam perditè amatis, Philosophiâ scilicet, blandâ atq; fallaci prudentes abstinete. Sed quia apud Logicos jam verba facio, magis succinctè & Logicè; Persona, Ratio, Instrumentum. Ne quis deprædetur per Philosophiam. Hæc tria sunt omnia, vt cum vestro loquar *Aristotele*, & trichotomia hæc meta erit, &



& terminus disquisitionis meæ.

Quis est iste Nequis? Vno ore omnes respondent interpretes. Nemo hæreticus, pertinax scilicet monstrum nullâ virtute redemptum à vitijs, Patrum dialecto; Simia Cameleon, Vulpes, Scorpius, Hybrida potius ex diuersis pugnantibusq; naturæ principijs conflatus, agninâ pelle, lupino ingenio. Arcendæ sunt huiusmodi bestia, & vitandæ ad vnâ omnes. Quanquam *Clemens Alexandrinus lib. I. Stromatum* damnari hic putet *Epicuri* Philosophiam, quæ in Deorum numerum voluptatem referebat. Nequis Philosophus, nequis hæreticus præsertim *Simonianus*, aut *Epicuri* de grege ventricolus Helluo, cuius schola est popina, cuius cathedra est mensa, cuius codices sunt calices, non tam sermone quàm nidore vos transuersos rapiat. Gratulor & mihi & vobis de hac qualicunq; *Clementis* notulâ, cum ansam præbeat, vt non tantum vera, sed etiam opportuna proferre possim. Quo enim tempore commessandi libidinem verbis melius exagitarem, quàm hoc ingressu quadragessimæ, quando Christiani iucunditas est seria grauitas, Epulæ sunt lacrymæ, pastus esuries? aut quo die belluinam hanc sectam barathrum macelli & voraginem, inferis potius amandari cupiam, quàm hoc ipso, quo publica *ἑορτασθῆναι* apud antiquos (vtinam apud nos etiam) votum est Ecclesiæ nostræ in Liturgiâ istius diei, in squalore & sordibus institui solebat? Cujus solennitas (est enim quædam debita & salutaris pompa pænitentia) multis describitur à Burchardo, Iuone, Gratiano. In capite quadragessimæ omnes pænitentes, qui publicam suscipiunt, aut susceperunt poenitentiam, ante fores templi repræsentant sese Episcopo ciuitatis, sacco induti,

duti, nudis pedibus, oculis in terram dimissis, reos se esse ipso habitu & vultu profitentes. Quid dicam Psalmos poenitenciales, gemitus, suspiria, cineres, cilicia, stationem poene nocturnam?

Doleo certè, & intus crucior, nos hodierno die non dolere, sed antiquam Ecclesiæ disciplinam ita esse antiquatam, ut non tantum formam & habitum poenitentiae sed vocabula etiam amisisse videamur. Pudet dicere, nos hesternas, carnales, male feriatas ferias in hunc usque diem continuare, sædissimas omnium festiuitates, quæ nihil distant ab impuris gentium *Bacchanalibus*. Potestne quispiam hodie vacare epulis? Studere crapulae? Siccinè sancto huic jejunio quadragenario nos apparamus, edulijs ingurgitati, lasciuiâ & immunditijs contaminati? Quis vnquam ferre potest belluinas illas voces; nihil tibi caro denega, ne te maceres jejunijs mea delicatula, comede, bibe, ride vnguementis madida, rosis coronata, naturam ducem sequere, noster enim *Christus* hâc nos libertate donauit. Quid aliud bos faginatus proferre vnquam potuit? Aut *Bacchicorum Orgiorum* Mystes cum lymphatâ mente furere inceperit? Vos autem dilectissimi *Baccalaurei* mei non à *Baccho* & hedera, sed à baccâ & lauro, industriæ, & doctrinæ insignibus titulum accepistis. Ite *Bacche*, abeste *Menades*, valete *Bassarides*, venite *Charites* cum *Musarum* choro, commendo vobis tenue corpus, subtile ingenium; mensam philosophicâ, mentem dapilem. Serio & ex animo precor, ut inter scholarum rixas, & arguta verborum bella illud etiam audiatis, quod *Augustinum* olim coeliùs excitauit: Tolle, lege, tolle, lege, sicut in die honestè ambulemus, non in commensationibus & ebrietatibus, non in cubilibus



& impudicitij *ad Rom. 13.* Valeat *Epicurus* Ventris mancipium; ut olida ejus argumenta, sic subtiles aliorum hæreticorum technas & strophas declinate.

Res ardua, sed magni erit momenti, explicare, quomodo Neophyti, (quos ego mihi finxi Auditores, & quos præsertim ab hæreticorum philosophantium fraude tutos esse velim) quomodo cum hæreticis, quos aucupes vocat *Augustinus*, qui viscato furculos propè aquas defigunt, ut sitientes aues decipiant, sine periculo versari possint. Verbo responsurus sum; O Iuvenes fugite hinc, latet anguis in herbâ. Beatus adolescens ille, qui non abiit in consilio hæreticorum, nec in via schismaticorum stetit; cumq; viris in fide confirmatis aciem & congressus decernerem, Iuniores *Parthorum* more pugnare velim, & fugiendo vincere. Non enim libenter scapham *Ægei* mari, aut pusionem cum mirmillone commissurus sum. Delectabitur lactens super foramina aspidis, & ablactatus in cauernas reguli manum immittet, *Esaiæ, 11.* Non erat proculdubio vniuersale mandatum, sed speciale priuilegium. *Paulus* fortasse viperam in ignem manu excutiet, & *Moses* caduceum vipereum contrectare potest. *Paulum* noui, *Mosen* agnosco, tu autem quis es?

Sed ne ex eorum numero videri possim, quos liberius perstringo (dolosi enim in vniuersalibus latere solent) Antiqui Patres speciatim vobis viam muniunt, nulla cum hæreticis commercia, nulla convivia, nulla colloquia misceantur, simulq; ab ijs tam separati, quam sunt illi ab Ecclesiâ profugi, ut animose *Cyprianus*. Notum est ferox ipsius ingenium, & lapsis nimis infensum, quasi ipse esset discipulus dilectissimi illius discipuli, *Ioh. 2. 10.*

Ne dicas illi Ave, qui ~~quique~~ ex *Cerinthi* balneo, quasi ex Gehennæ puteo fuga sese surripuit. Mitiùs *Augustinus*; Ecclesiam teneo plenam tritico & palea, paleam fugio, ne hoc sim, non aream ne nihil sim; apud quem aurea est illa regula: Non propter malos boni deserendi, sed propter bonos mali tolerandi. Separavit tamen sese à separatistis, qui dum timent, ne sint fortè hæretici, sine dubio manifesti & aperti fieri volunt schismatici, oves solitariae, ouile deserunt, & fiunt præda rapacis. Aliud enim est persona, aliud dogma, semper fugio hæresin, non semper hæreticum, cum quo civiliter, aliquando ut cum membro corporis politici, nunquam religiosè, ut cum filio Ecclesiæ versari possum.

Quid igitur obgannunt incauti Adolescentes? Quid periculi, si Deum Papicolarum panaceum, ut communem panem comedero? si missæ Pontificiæ corpore tantum interero? si Ignatianos aut sacrificulos postillatores audire velim? aut libros eorum legere, ut argumenta confutem melius, aut ut argutiolas ridere possim? Primi parentis peccatum luimus & imitamur. *Pi*sta tangenda non erit. Nos hac à scabie tenemus vngues.

Synaxis & sacratissima Eucharistia communio est factor, non tamen cum *Belial* aut *Dagone*. Quid facit miles *Christi* in castris *Antichristi*? Aut quod merebitur stipendium, qui sub hostium vexillis militauerit? Nul- lum religionis vel nomen esse potest, nisi homines aliquo signaculorum vel sacramentorum visibilibus confortio colligantur, ut contra *Faustum Manichaum* docet *Augustinus*. Sacramenta Ecclesiæ sunt sigilla Christi, quid illis commune, cum caractere bestiae? Sunt retinendæ unitatis vincula, societatis Christianæ notæ, quæ



quæ apud hostem aut ab hoste nonnisi transfuga accipere potest. Veteres Christiani extrema potius pati voluerunt, quam hæreticæ synaxeos participes fieri. *Constantinopolitani* Catholici nullis tormentis adigi poterunt, teste *Sozomeno lib. 4.* vt cum *Macedonio* communicarent, *Samosateni* à *Theodoreto*, *Satyrus* à fratre *Ambrosio* eo nomine iustis præconijs celebrantur. Abeat igitur missa in barathrum perditionis, vnà cum missitante missificante sacrificulo, cum sit struma religionis & sentina idolomanias vniuersæ.

De contaminatis enim contaminamur, inquit *Tertullianus*, neq; sufficit, si mentem intactam & liberam habeamus, nisi aures oculosq; & reliqua corporis membra inviolata esse velimus. Horrendum erat iudicium, quo *Dathan* & socij turbine abrepti erant, terra patuit, rapuit, clausa est. Et ne beneficium de mortis compendio consequi viderentur, dum non essent digni vivere, ijs nec mori concessum est, tartareo carcere subito clausi, ante sepulti, quàm mortui.

Si facta imitamini, exitum etiam illorum perhorrescite. Clamabat *Moses* ad populum. *Num. 16.* Separamini à tabernaculis *Chore*, *Dathan*, & *Abiram*, & nolite tangere, quæ ad eos pertinent, ne inuoluamini peccatis eorum. Non consensum, sed contactum, non affectum sed accessum aperte negat. Admoueri tantum superstitiosis est genus quoddam sacrilegij, dicit *Salvianus*. Quod *Augustinus* praxi confirmavit, qui ex *Manicheo* Catholicus palam profitetur, pro veteri necessitate, quam cum ipsis habuit, mitius cum ijs se acturum esse, hac tamen lege seruata, vt vobiscum non orem, vt conventus vobiscum non celebrem, vt *Manichei* nomen non

non accipiam. Magnum chaos est inter nos, inquit *Abraham*, *Luc. 16*. Longius à pietate Christianâ distant hæretici, quàm à *Lazaro* Paradisi incolâ infelix *Dives* apud inferos. Quid faciunt in eodem templo, qui in eodem coelo simul esse non possunt? Cum igitur hæreticorum sermo cancri more sensim prorepat, ita ut venenato halitu astantes jugulet, neq; solum tactu, sed ut basilisci solent (teste *Lirinensi*) visu affatuq; percutiat, quis est iste aurium pruritus, ut audire eos velis, quos sine animæ discrimine videre non possis? Nolite exire, dicit *Christus*; nolite audire, clamat *Jeremias*; declinate ab illis ἀποτρέψετε auersare, jubet Apostolus, triplex hic funiculus solvi faci'è non potest, non debet. Tu tamen frustra prohibente Christo, reclamantibus Prophetis atq; Apostolis, eorum blasphemijs aurem præbere velis.

Has animæ fores pessulis & obicibus contra eorum voces obserate, oculorum insuper fenestras clausas atq; munitas moneo, ne scripti alicujus hæretici contagione lædi, aliquando possint. Si enim vox transiens per portas aurium animum depredetur. Quid de libro sentiendum erit, cujus verba sunt magis familiaria, & ad fraudem composita atq; expressa, oculis fidelioribus subiecta, quæ non tantum transcurso docent, sed hærent; non tam in commentario, quàm medullis & sensibus infixæ atq; insculptæ. Volatile enim malum est volumen hæreticum, terrâ mariq; in omnes regiones trajectum, & ubi vox viua penetrare non potest, litera hæc scripta & mortua viam inveniet.

Cathedram pestilentiae *Psal. 1*. acutè vocat *Augustinus* hæreticorum scholas, characteres impressi sunt vices & sanies, quibus infelix malum in venas & fibras in-

time



timè transmittetur, purulentæ eorum paginae, non atramento, sed toxico exaratae ita inficiunt, ut quicquid tetigeris, vlcus fiat. Ova aspidum eas vocat *Naxianzenus*, quia monstroso, sed Homogeneo partu aspides parturiunt, quales illarum scriptores esse solent. Vnde *Conciliorum* placitis, & *Principum* edictis cautum erat, ut *Vulcano* & flammis dicarentur, ne in manus hominum venire possint. In sextâ Synodo generali historias ab hæreticis confictas igni tradendas curarunt Patres, *Constantinus M. Arrj* scripta, *Theodosius* & *Valentinianus Nestorj*, *Valentinianus* & *Marcianus Eutychetis* & *Apollinaris*, *Honorius* & *Theodosius* libros Mathematicos, hoc est, Magicos, *Arcadius*, *Honorius*, & *Iustinianus* libros omnes omnium ubiq; hæreticorum vnica quasi pyrâ publicè comburi iubent. Quidni in flammis cantitiones isti fumigantes, ut si fieri possit, hæresis cum hæretico simul pereat, potius, quàm ut incendio sancta Christi Ecclesia corripatur, aut ut hominum animæ in ignem transeant sempiternum.

Mitto inquisitores Pontificios cum eorum regulis, Tyrannicum fateor, sed prudens institutum, & *Lutheri* lepidum simul, & animosum facinus vobis commendo. Cum *Coloniae* Theologi, & professores *Lovanij*, ipsius lucubrationes palam incenderent,

*Ardet adoratum populo caput, & crepat ingens*

*Lutherus*; ipse ut par referret, convocatâ omni multitudine, scholasticâ *Wittenberge*, & magnâ Doctorum hominum coronâ; jus Pontificium & nuperum *Leonis* decretum igni tradebat, seq; exemplo Apostolico, *Act. 19.* tueri conatur.

Conqueri mihi liceat de miserandâ nostrâ conditio-

ne, cum libri omnium ubiq; hæreticorum apertâ facie sub dio ambulant, prostant in bibliopolijs, prostituuntur in compitis, omnium teruntur manibus. Apud Pontificios tradunt *Casuiſtæ*, noſtrorum hominum nomina expungenda eſſe, & pro authoritate conſcientiâq; , quâ præditi ſunt, ſingulari, non audienda uſpîam, niſi in libris catholicorum per ignominiam atq; contemptum, neq; imagines proteſtantium ſerendæ erunt, niſi forte *Lutheri* effigies apud Inferos ardentis, aut ubi genio & ventri nimis indulſerit, & præ immodico potu ciboq; animam exhalârit. Hæc ſi quiſpîam finxerit aut pinxerit, facinus meherculè coelo dignum & meritorium! Nos interim incauti nimis (ut nihil graviùſſimam) pompaticè *Ieſuitarum* citamus libros, & nonnunquam honorificè Doctores hos hæreticos etiam in pulpitis ſalutamus, magno ſanè & Eccleſiæ & cauſæ ſcandalo, non enim laudandus liber, cujus author damnatus, & ut cum *Sidonio* loquar, non ſit perſona cordi, cujus ſectâ deſpectui.

Ad vos iterum revertor candidi & agnini Auditores mei, pro innocentia hac & candore, quem non veſtibus tantum, ſed mentibus inſitum & impreſſum habetis, nolite pueros inceſtare oculos, aut ſinus manuſue polluere, contactu ſœdo, aſpectuq; libellorum infamium: Triobolares nugæ ſint ventorum potiùs ludibria, & *Cuſcalæ* hæc (honor ſit veſtris auribus) cloacinæ dedicanda, non muſis; latrinis potiùs, quam Muſæis. Quid Catechumenis cum controverſijs, cum Deo *Elia* & vobis non in turbine contentionum, ſed in placidâ atq; tranquillâ devotionis voce apparebit? Quid vobis cum dentatis hominum malè feriatorum chartulis, *Gretſeri*, *Bolſeæ*, *Fevardenti*, *Parſonij*, aliorum, quas purpurea illa meretrix



meretrix obstetricante Antichristo ex impurissimo ipsius vtero enixa est. Strangulentur hyperbolimæi parvus, virgulâ censoriâ & stilo Critico transfigantur, cum nullus Index Expurgatorius purgando huic *Augai* stabulo par esse possit.

*Vos ego pupillos moneo, quibus amplior est res;*

*Custodite animas, & nulli credite raso.*

Satis multa jam dixi de peste hæreticâ, *Lolio & Zizanijs*, quæ agrum Dominicum miserè infestant, si vestri cura, & Domini timor non commoueat, periculum tamen vos planè terreat. Secundo enim in loco Pseudolus est & falsarius, fur & prædo quivis hæreticus, brevis hæc tabella textus duplex hoc & Lubricum vtrinque; malum vnico tantum verbo graphicè delineat. Græcum enim illud *συλαγωγῶν* Latinâ editione vulgatâ & veteri ita sonat; Nequis vos decipiat. *Hieronymus, Eyprianus, Ambrosius, Hilarinus* magis accommodatè (Quia enim prædam & exuvias denotat) nequis uos spoliet, aut deprædetur. Vtrumque; verum, via fraus est, præda terminus hæreticæ pravitatis.

Inter omnes animi labeles & vitia, nulla fraude est capitalior, aut magis naturæ inimica; quæ spuria mentis prævæ progenies in latibulis degit bifrons atque bilinguis, ut mala & noxia deprehendi possit, stigmate inusta flagitium designat, dolusque; malus singulari malitiæ privilegio appellatur. Nescio tamen quomodo ab eo tempore, quo antiquus hostis, serpens ille, veteratorie communem matrem, eaque; hiantem & credulum maritum pomo pellexit, nihil charius & antiquius habet humanum genus, quam fallere & simul falli. Creavit Deus hominem rectum, ipse multis se implicuit inventionibus,

bus, inquit *Ecclesiastes Regius*. Divaricatur humanus intellectus, & relictâ viâ regiâ veritatis semitas tantum quærit, & diverticula. Longum esset omnes simul meandros, & implicitas imposturæ vias vel digito attingere. Totus enim mundus est quasi magna quædam muscipula, hamis & laqueis vndiq; vbiq; irretimur, neq; tantum in plateis & compitis sunt fraudes circumforaneæ, sed in officinis (quod sentiunt Academici) etiam artes meritoria, & versutia (si Dijs placet) urbaniores, & quod mirandum magis, in agris sunt strophæ quædam subrusticæ, non minus familiares, quàm captiunculæ & sophismata in scholis; quodq; dolendum imprimis erit, domus Dei facta est spelunca latronum, ita vt simplicitas Christiana ab hæreticorum fraude & technis nusquam immunis & libera esse possit. Mercatura est & perjurium in arca tabernaculi; Simoniacus & bractæatus asinus cum Mysteriorum strue, aureus alter vitulus in monte *Horeb*, vt mulgeant, rondeantq; Christi oviculas, jurant, pejerant, quasi Deo ipsi imponere possint:

---Contemnere fulmina, præsul

*Creditur atq; Deos Diis ignoscentibus ipsis.*

Non enim Dei, sed Ditis mystæ. & Sacerdotes, hæretici, lucro tantum & Lauernæ sacrificant. Pulchra Lauerna, des mihi fallere, des justum sanctumq; videri. Hamata enim sunt eorum verba, vt scitè Aponius, & simulata sanctitas ijs illecebræ aut sagenæ loco, quâ callidi piscatores cuncta converrunt cum pulvisculo. Illud retiarij apud *Festum* meritò usurpare possunt; non te peto, piscem peto; non te, sed tua, non animam sanctam sed animal opimum sibi saluum cupiunt. Perfidi quidam Magistri, qui per funem aureum coelo delapsi inhiant locupletum



cupletum fortunis, divites orbos, coelibes incautos, deliros senes, superstitionis aniculas blandimentis alliciunt. Numipetæ quidam captatores vincta tantum patrimonia abliguriunt, & quasi essent emundatoria nova sanctuarij, non extremi Lychni oram, sed sectatorum ora calidè emungunt. Nota igitur & Character sit Ecclesiæ malignantis, quod negotiatrix sit, cauponibus similis, qui terrenis, imò Tartareis perituris simul & perdentibus nundinis studere & sudare volunt.

Inter omnes autem hæreticos nullus adeo propola, atq; publicanus, quàm sunt Pontificij, cum turris Babylonica duabus tantum sublicis, ambitioni & avaritiæ, capiti visibili & ventri Monachorum inexplebili inniti videatur. Mystica enim est eorum theologia, neq; quifquam apud eos gratis est Christianus, cum non intersit quid quisq; credat, sed quantum soluat, neq; curatur, an sit, aræ & Deo utilis, sed Pontificis culinæ, aut consistorio. *Esaías Dei nomine Cap. 55. v. r.* Invitat sitientes: Venite ad aquas, & qui non habetis argentum, prope- rate, emite sine pretio vinum & lac. Romanus autem Institor; Abite inopes & famelici, ausim dicere, si *Petrus* ipse accederet, & paupertinus antiquam caneret cantilenam: Aurum & Argentum non habeo, successor purpureus proculdubio non agnosceret fundatorem suum, neq; in propriam ipsius cathedram eum unquam reciperet. Habenti dabitur, verum est *Roma*, in literâ & sine tropo, ubi animarum salus venditur potius, quam prædicatur. *Curia Romana non curat ovem sine lanâ.* tondere possunt, & deglubere gregem magis, quàm verbo & exemplo pascere. Cumq; salvator dixerit: Facilius esse Camelo, transire per foramen acus, quàm di-

vitem intrare in regnum coelorum, hæc mutatis vicibus apud *Romanenses*, fors & fatum, qui si sinum quoque Abrahæ largiri potuissent, melior esset luxuriantis divitis conditio, quàm beati *Lazari*, qui non magis extorris à divitis mensa, quàm ab eorum coelo alienus. Thesaurus est (vt ipsi perhibent) in eorum Ecclesiâ inexhaustus; Facile credo, vbi tot indulgentiæ, confessiones, reliquiæ, miracula, aræ, imagines, & vorago pecuniarum purgatorium. Hæ sunt aurifodine *Pontificis Romani*, qui plus debet scholasticorum acumini, quàm aut *Constantini* felitiæ donationi, aut patrimonio *Petri*, aut Ecclesiæ territorio, qui pyrachmones argumentorum, & conclusionum, aridas quæstiones in aurum & quæstum converterunt. Transubstantiationem jam agnosco, non panis in corpus Dominicum, sed positionum & conceptuum vestrorum in metalla pretiosa. Iam jam efficaci domus scientiæ, cum arte Iesuiticâ imago muta neque minùs stupidus mussitans sacrificulus, reliquiæ mucidæ, ossa arida, & limbus imaginarius, umbræ rerum & phantasmata quæstui esse possint. Meritò nos despiciunt divini isti artifices, cum eorum sensu sola fides sit jejunum & aridum dogma, & vt summatim dicam, scriptura sine traditione, Ecclesia sine capite visibili, Pontifex sine iurisdictione temporali, Clericus sine votis, sacramentum sine sacrificio, opera sine meritis, tota nostra Theologia negativa (vt ipsi vocant) quia lucrum negat, non sententia, sed dementia æstimatur. Verbo expediam, illi paupertatem vovent, Ecclesiæ autem nostræ ministri rapinis Laicorum exhausti reverà patiuntur. Tam longè tamen absumus à fraude & versutia, quàm æquivocantes *Iesuita*, à *Iesu* & veritate. Nemo apud  
nos



nos solet quempiam aut *Gilbertare*, aut *Druriare*, non tam verborum soloecismum, quam rei barbariem perhorrescite. *Watsonus* quotlibeticus ipse *Romanensis* & Sacerdos, catalogum satis longum pag. 89. jam olim contexuit, (neq; dubium, quin prodire nunc possit multo auctior & emendatior) quorundam Papistarum quos *Iesuitæ* prætextu exercitij cuiusdam spiritualis (ô Diabolicum inventum!) miserè spoliarunt. Inter quos primas tenuit *Henricus Drureius*, antiquæ & nobilis familiæ, qui amplissimum in agro Suffolciensi prædium vendidit, pecuniam confessori dedit, in partes transmarinas abiit, spacio panè novendiali (ne jam nudus molestus esset patribus) non sine suspicione interiit. Vnde *Druriatus* in linguâ *Esauiticâ* est stupidus Papicola, omnibus fortunis religiosissimè exutus, sine re, sine spe, sine lare, quem nudum & frustra rogantem nemo toro, nemo hospitio tectoq; juvabit.

Hæc est practica eorum Philosophia, Ethicam, Oeconomicam totam converterunt in politicam *Atlantis* rerum publicarum. Neq; speculativa minùs periculosa. Videte igitur ne *Iesuitæ* vos deprædentur per Philosophiam. Ut falsa & fraudulenta phenomena ad oculum demonstrare possim, quo tendant portenta illa opinionum? Accidens potest esse sine subjecto, quantitas sine corpore, species visibiles panis in non pane, forma materialis sine materia, vnum corpus in duobus locis simul, nudæ species tamen nutritivæ. Hæc in prædicamentis, in Physicis, in Metaphysicis dolosè vobis ingerunt, ut panem istarum propositionum possitis aliquando concoquere. Ut aliùs ego rem istam repetere possim, (brevissimè percurram) quia philosophandum de Philosophia, sed paucis.

Primævis

Primævis Ecclesiæ sæculis Philosophos pessimè audivisse apud Christianos, omnibus qui venerandæ Canitici antiquos Patres vel à limine salutarunt, cognitum perspectumq; est. *Tertullianus* in aureo præscriptionum libro totus est in exagitandâ Philosophiâ, à quâ hæreses & subornari, & proficisci enucleatè docet. Celebris est censura apud eum, Philosophos esse hæreticorum Patriarchas, cui *Irenæus*, *Chrysostomus*, *Nazianzenus*, *Eusebius*, *Cyprianus* calculum apponunt, quid *Athenis* & *Hierosolymis*, quid *Academia* & Ecclesiæ, & sexcenta hujusmodi? Nemo tamen existimet, hoc eo animo aut ab ipsis dicta, aut à me prolata esse, quasi humaniores artes è republicâ Christianâ exterminandæ essent. Eruditus erat *Moses* omni *Ægyptiorum* sapientia. *Act. 7.* Ethnicorum artes sunt spolia *Ægypti*, quæ jure nostro tanquam ab injustis possessoribus repetimus, & quasi divitiæ *Tyri*, & ut aurum *Ophir*, quibus Dei templum ornabatur, *Sanctus Hieronymus* cum ei objectum fuisset, quòd plus satis sæculari literaturâ vteretur, quasi candorem Ecclesiæ Ethnicorum sordibus pollueret; hoc, inquit, gladium est extorquere de manu hostium, & mucrone proprio *Golie* truncare caput; At captivæ mulieris caput radere oportet, supercilia, pilos, ungues amputare, & sic habere in matrimonio. Omnes scientiæ & artes pedissequæ Christianæ fidei, non secus atq; *Sara* *Hagar* ancillentur, *Regnum* earum non patimur, sed *ministerium*, & ut *Aristotelis* Logica Philosophiæ, sic ipsa Philosophia organon sit divinæ planè ac coelestis theologiæ. Ite nihil sanantes literæ, Ite *Syrenes* in perniciem dulces, quas scenicas meretriculas acutè *Boetius* vocare solebat.

Verba



Verba subsequencia sunt instar pleni & locupletis commentarij, scientia perniciofa est, cujus principia sunt *elementa mundi*, qualia sunt crebra apud *Aristotelem*, quæ observavit *Melchior Canus*, lib. 10. Locorum, quæ cum mundi creatione, Christi incarnatione, animæ immortalitate, Dei singulari providentia, stare simul non possunt: Carnis resurrectio, & virginis puerperium sunt apud eos *ἀνέροι* meri, quibus non magis credendum quam si,

*Vel mulier vitulum, vel si bos ederet agnum.*

Secundum *κελεύειν* est *inanis fallacia*, non quali acumen Logicum, aut disceptandi artem damnare velit, quæ si antehac utilis aliquando fuit, nostrâ quidem tempestate, in quâ homines contentionis magis avidi, quam veritatis, absolutè necessaria dici potest. Quod sanguis in venis, aut potius, quod anima in corpore, tota in toto, & tota in parte qualibet, illud certè Logica, non tantum in Philosophiæ studijs, sed etiam Theologorum mysterijs, à quâ nervos & vitam & spiritum mutuatur. Ejus ego studium neophytorum classibus commendatum esse velim, ut missâ rancidâ Martialis, & Petronij lectione, nervosam & virilem Dialecticam amplecterentur; neq; compendia doctrinæ, & rivulos sectarentur; sed perenni *Aristotelis* fonte se totos imbui & perfundi velint. Apagete liberales illiberales omnes disciplinæ, abite meræ Ethnicales atq; gentiles literæ, cum stigmate hoc in fronte, quod est in calce istius versiculi: *Non secundum Christum*. Is solus est Mel in ore, in aure melos, ut suaviter *Bernardus*. Ego via, veritas, & vita, *Iohan. 14. 6.* Via vitæ, veritas viæ, & vita veritatis. Vana & inanis est omnis scientia, quæ non est aut objectivè de Deo, aut

ordinativè ad Deum, aut terminativè in Deum. A Deo, per Deum, ad Deum. A Deo, quia primum principium essentiæ, simul atq; scientiæ. Per Deum, quasi infallibile medium. In Deum, quia finis ultimus. In hoc centro invisibili, indivisibili sit & hoc tempore, & in æternum quies.

Estote igitur Pythagorei Deo si ipse dixerit, Peripatetici cœlo, mundo Cynici, Sceptici hereticis, semper autem verè Academici modesti, sobrij, & studijs strenuè incumbentes.

A Deo hoc vestro optimo, Maximo, nemo hominum vos abducatur, avolent quantum volunt, leves paleæ; seducat Hæreticus mulierculas onustas peccatis; decipiat petulcos & luxuriosos scurras, qui mane confitentur, ut noctem liberiùs incestare possint; vexet insanos peccatores, qui relictis Christi meritis plaustrum indulgentiarum, & aquæ lustralis Oceanum sibi acquirunt; spoliet miserum *Drureium*, ut eum miserrimè occidat; Vos autem Germanos *Academia* matris filios, minora scholarum lumina, literarum delicias, reipublicæ spem, Ecclesiæ semen, cœli hæredes, vos, nemo vos, unquam deprædetur. State firmi in fide, resistite peccatis, pro veritate, si opus fuerit, usq; ad sanguinem dimiccate, & Deus gloriæ per Christum in regno gloriæ, in æternum vos coronabit. Cui Deo, trino Vni, Patri, Filio, & Spiritui Sancto sit omnis Laus, Honor & Gloria in secula seculorum.

AMEN.  
7 DE 65  
FINIS.



